

宋文鑑卷第一

朝奉郎行秘書省著作佐郎兼國史院編修官兼權禮部郎官呂祖謙奉
聖旨銓次

賦

五鳳樓賦

梁周翰

籍田賦

王禹偁

端居賦

种放

大蒐賦

丁謂

洞庭賦

夏侯嘉正

矮松賦

王曾

聲賦

張詠

春雪賦

錢惟演

君可思賦

楊億

五鳳樓賦

梁周翰

伊京師之權輿也遐哉邈乎驗河圖之象按輿地之書宅禹貢豫州之域距天文辰馬之墟因四履建侯之地爲六代興王之居城浚而都派河而渠結坤之絡振乾之樞星臺櫛堵我民之廬海漕山廬我田之租勢雄跨胡氣王吞吳茫茫萬國魚貫而趨惟聖

皇之受命應期運而握符光潛躍於龍德踐元亨於帝衢道德何師尊盧赫胥揖讓何比陶唐有虞英略神武威憚八區封豕必誅長鯨盡剝虎皮包刃鵠板搜儒墜典皆索闕政咸鋪成天下之大務若電奮而風驅乃顧京室時行聖謨陋宸極之非制稽紫垣之舊圖且曰不壯不麗豈傳萬世禹之卑宮蓋勿暇之計堯之茅茨非經久之制矧象魏之縣法伊億兆之所視況我力如天我貲如地不漁爾民不牟爾利一毫之費差足爲易乃詔其工度景之中因舊謀新庀徒倬功臺卑者崇屋卑者豐棟易而隆椽斲而礪去地百丈在天半空五鳳翹翼若鵬運風雙龍蟠首若鼇載宮丹楯霞繞神光何融朱楹虹植晴文始烘繡楣焜耀彫棋玲瓏椒壁塗赭綺窗暈

紅雙闕偶立突然如峰平見千里深映九重奔星墜而交觸靈景
互而相逢門呀洞缺若天之裂縱舉百武橫駕六轍金鋪爍人光
景明滅舞陽之力莫得而排叔梁之力胡可以扶其下則冠蓋威
蕤劒佩陸離車如流水待漏而馳駕肩排踵兼蠻渾夷萬眾紛錯
魚龍尊卑咸去來之由此競奔湊於玉墀亶皇風之無外豈朝盈
之有時三事庶尹乃拜表蕭牆謁帝未央以落大壯登謁永昌曰
元聖明兮帝道昌威四海兮君萬方時高闕兮冠百常赫宋德
兮垂無疆瞻天顏兮獻壽觴願君王兮長樂康帝曰俞哉爾觴且
置當聽朕言庶曉朕意頃於戎馬之暇詳窺歷代之紀乃知乎夏
德之衰璇室自此商政之壞傾宮大侈楚王章華一身何寄秦皇
阿房二世而棄漢武柏梁孽火隨熾陳后三閣義師尋至豈非乎
禍生於漸欲起於恣亦如崇飲不已必至昏醉嗜色不已必至乏
瘁遷怒不已必絕人祀窮兵不已必暴人齒甘諛不已必杜忠義
溺讒不已必斥賢智亡國之君未嘗不爾朕皆知之得以趨避淫

於土木雅不如是美其成功良以爲愧不舉君觴恐驕朕志其大者天地所重者神器尾虎足冰終日惴惴當其重之勿使顛墜謹謝公卿無忘納誨羣臣乃退咸呼萬歲

籍田賦

王禹偁

臣謹按周制孟春之月天子親載耒耜籍田所以事天地山川社稷先王醴酪粢盛于是乎取之恭之至也自周德下衰禮文殘缺故宣王之時有虢公之諫秦皇定霸鮮克由禮漢祖龍興日不暇給孝文孝景始復行焉昭帝弄田亦其義也後漢永平中明帝東巡耕於懷縣非古制焉魏氏親耕闕百官之禮蓋草創爾晉武太始之年略修墜典宋文元嘉之代亦舉舊章齊用丁亥之辰梁以建卯之月後魏北齊沿革有異隋朝唐室文物可觀太宗行之于前明皇繼之于後自茲已降廢而不行將煥先農必待真主 皇家享國三十載 陛下嗣統十四年武功已成文理已定乃下明詔耕于東郊百執悅隨三農知勸禮官博士蹈舞而草儀甸師嗇

夫謠詠而供職有拾遺直史館王禹偁再拜而颺言曰耕籍之義大矣哉千畝之田三推之禮所以教諸侯而事上帝率人力而成歲功實邦國之彝章皇王之大典昔潘安仁賦之于晉岑文本頌之于唐今王道行矣王籍修矣神功帝業煥其有光宜暢頌聲以播樂府謹上籍田賦一章雖不足形容盛德亦小臣勤拳之至也其詞曰

十四年兮帝業遐宣寰區晏然乃順考於古道將躬耕乎籍田務本勸農稽前文而備矣事神教養舉墜典以行焉萬國歡心而懌懌百官供職以虔虔章儀注於有司議沿革於遺編築壇墀之三陛開阡陌之百廛文物聲明合禮經而有度旌旗衣服應方色而不愆旣而屆孟春擇元日太史先奏天子將出是月也適人徇路星鳥中律當東郊之迎春是東作之平秩皇帝於是卽齋宮辭帝室戒錫鸞嚴警蹕乘青輅以有威儼朱紘而無逸佩乎玉也懸藜之色蒼蒼載其旂焉千呂之雲鬱鬱屬車負播殖之器後宮獻

種稂之實紅縻黛耜服葱騊以陸離縹輓紺轅駕蒼龍而飄歔太
常之禮具舉司農之屬各率甸師掌舍警御陌以惟嚴封人野廬
設墮宮而靡失於國之東干官景從風清塵而習習雨洒道以濛
濛時也木德盛陽氣充春芒甲坼青青兮蔥蔥春土脉起油油兮
溶溶冠蓋蔽野珮環咽風狀浮雲兮隨應龍旂幟張日車徒塞空
若眾星兮環紫宮修農事以惕惕襲春服之重重爾乃配少皞祠
先農尸祝無媿豆籩以供太牢之牲薦之而肥腩太蒨之樂奏之
而春容於是修帝籍勞聖躬撫御耦以無怠履游場而有蹤將循
乎千畝之制豈止乎數步之中耕鈎盾之弄田但矜兒戲修建康
之春籍未煥農功有以見萬乘之尊三推而舍或五或九降殺之
義有倫爾公爾侯貴賤之班相亞嗇夫灑種以斯畢庶人終畝而
告罷千耦其耕煥乎禮成播百穀兮率人力譌載芟兮揚頌聲將
見乎餘糧棲畝腐粟如京神倉令納乎黍稷以備粢盛廩犧氏收
其藁秸用餉犧牲親畎畝兮化被重民天而教行自得訓農之實

非貪慕古之名然後下青壇歸絳闕百姓知勸羣后咸謁在鎬之
宴啟謨虞之音發獻萬壽兮懽呼奏九韶兮鏗越開三面以行惠
宥五刑而審罰恩流於孝悌力田德被於雕題辨髮興五土之利
固必躬而必親同三代之風復不矜而不伐大矣哉籍田之禮豈
三年而不爲躬耕之義將百代而可知我所以舉久廢之禮定不
刊之儀慮弗勤於四體將有害於三時務農桑兮爲政本興禮節
兮崇教資民乃力穡歲無阻饑神農斲木之功我其申矣后稷播
時之利我得兼之供秬鬯以斯在介豐年而有期丕顯事天之禮
誕謨祈社之詩祀山川兮神鑒明矣配祖考兮德馨遠而永錫純
嘏用光孝思乃作頌曰倬彼東郊公田是闢大君戾止言耕其籍
帝籍旣修乃及公侯親爾耒耜勤爾田疇言采黍稷祀於圓丘億
萬斯年以承天休又曰倬彼東郊耕壇其崇大君戾止言訓其農
農功旣督乃知榮辱爾家以給爾人以足言奉烝嘗遍於比屋億
萬斯年以介景福

端居賦

種放

予嘗闔扉而居不樂他游未嘗以一詞輒干公侯以借浮譽門外
苔封草織非知己之深者無一造其居或罪予曰嗟乎明逸上有
明天子賢執事子獨貧且賤恥也又易稱君子以貞凶子其有是
乎予退而作端居賦

山鳥寂寂梧陰晝碧窮居退夫耿然不懌精神沮而徜徉冠屨陋
而跼蹐類沈酣而未醒豈執迷而莫析固貽譏於獨善尙多言而
自釋鯨鵬雖大無風波而何益胡粵萬里捨舟車而奚適在聖賢
雖有志於下民孰能無位而立辟況予才不迨於往哲名器敢期
於苟得在得喪不忘於明聖顛沛必思於正直終皮弁以自守惡
鷗冠以假飾進不妄而嘻嘻退不怨而戚戚故孟軻有言雖有鑑
基不如逢乎有年顏氏幾聖樂在陋巷亦將育乎令德茲窮通之
自信匪古今之可尤顧竊位而擇肉兮予誠自羞寧守道而食芹
兮中心日休予將息萬競消百憂養浩氣於蓬茅之下飲清源於

淵默之流侶鸞鵠兮雲霓之表終焉泯眾議之啾啾

大蒐賦

丁謂

司馬相如揚雄以賦名漢朝後之學者多規範焉欲其克肖以至等句讀襲徵引言語陳熟無有已出觀子虛長楊之作皆遠取傍索靈奇瑰怪之物以壯大其體勢撮其辭彩筆力恢然飛動今古而出入天地者無幾然皆人君敗度之事又於典正頗遠今國家大蒐行曠古之禮辭人文士不宜無哥詠故作大蒐賦其事實本之於周官歷代沿革制度參用之以取其麗則奇言逸辭皆得之於心相如子雲之語無一似近者彼以好樂而諷之此以勤禮而頌之宜乎與二子不類辭曰仲冬

天子嚴祀事答神祐佇農隙謹蒐狩踵教本稽典舊禮容左右武事前後等尊第卑上長下幼人民豐濃物色繁富蓋亦閱軍實於介冑非徒恣遊畋於禽獸者哉前期命虞人以采莽蒼芟擁遏草木蹏枯原隰砥閭視軍眾寡度地本末高表四立坦場中豁限田

防而蘭織志轅門而旌揭青龍白虎擁護平行在之所左罕右畢
分張乎侍衛之列風蕭蕭而野鳴雲陰陰而晝結麋鹿狼狽以投
林狐狸踉蹌而遷穴由是司馬舉職羣吏咸秩各有司存皆給名
物備法駕而六龍集開武庫而五兵出輅車金玉旂章日月戟牙
刺舉旄頭雪密畫蚩尤於旆顛匣干將於劒室騏驎妥貼以負輓
驪騮徘徊而轉軼召佺飛以前導命玄武而殿卒目恍羅列神驚
比櫛師勅戰法帥董戎律始建旗以誓眾亦斬牲而戒失所敗之
野備物咸畢外事尙剛戊日惟吉上乃乘七騶擁六軍白旄方
下於北極黃纛已舉於應門服章天地車駕風雲日隨月侍嶽走
川奔列缺收聲而聽蹕豐隆鼓力以扶輪隊仗乎八百諸侯殿呼
乎七十二君煙霞錯雜以垂地河漢顛倒而失源靈祇懾慄怪物
騰騫顛帝蒼黃而廢職元冥倏閃以馳魂嚴方離於大內盛已列
於平原禡表云已銜枚而前蚺陣翼張虎賁環匝鼓以三闕圍不
四合律戎索以濟濟飭軍威而燁燁鐸再振而鐃再鳴弓斯張而

矢斯挾爾乃驅百獸當一人弓工操軒轅之弧奉御羅氏設商湯之網擁羣熊羆之爪距摧折虎豹之心肝分裂射必三獸發則五犯電逆毛羽星颺角牙肉墮庖丁之刃血濺魯陽之戈諸侯卒事以儼雅百姓突圍而交加上方斂綏以慘愴眾乃靡旗而誼譁圍開一方憫盡殺也捨順取逆彰懷來也出表不顧恥逐奔也等別三殺貴宗廟也得匪上以顯孝思下以不憊乎鳥獸之肉不登器者無取貔虎之士罔用命者有誅警進退於鉦鼓習威儀於卒徒戎事同鑾輅迴軍聲振而萬國聳立天仗指而九門洞開郊饁獸而禮之勤也廟獻禽而神其享哉以勞飲至以能策勳刑必加於其棄爵乃及乎眾尊如是則不曰暴天物不曰教民戰于以辯名號而訓仁義于以昭文章而明貴賤也下臣竊詳三代之書頗究二王之典大閱之制昭然義見軍旅之事闕教則失利祭薦之制非理則不獻施信賞率怠倦使夫民知方兵識變莫若示蒐畋而敦大勸也後之王者反禮叛經荒樂誅殺放懷蕩情借如漢武

於古詳明博搜聖書廣召文英講評謨訓華飾聲明凡曰大樂闕焉不行乃窮畋極獵誇國耀兵隔蜀羅設跨秦戈橫霹卯天死猶狻愁聲以至欺猛狂而手格喜暴惡以力爭豈殘忍之足恥雄豪勇之所京下垂厯代不能變更魏晉而下離合衰瀛咸局促以僅守曷禮樂之能興粵抵李唐時惟會昌彼文明二帝實驅馳百王大畋之義猶或廢亡者若 陛下自膺寶命臨萬方動必法度舉皆故常緝犧軒之絕緒新姬孔之舊章郊焉而五帝肅肅享焉而百神洋洋九年三月升于糾壇十有三年躬耕籍田心以民本事由禮先謫王滿嗜慾乎馳騁斥帝徹瞽瞍乎神仙故天地不能藏祥而祕瑞日月無以示譴而戒愆甘露降而區宇澤景星燭而氛祲蠲總治本操化源措慮寂爾存神泊然是以發狂之心無自入焉下臣以謂大蒐之典周公制於往古 陛下行于今茲中間數千餘祀咸杳昧而不知彼唐漢之士修崇禮儀封禪之徵誕明堂之說奇此數事不詳於堯舜文武之書臣寧敢狂斐而陳諸所以

賦大蒐而謁盛禮也俾千古知至德之巍巍

洞庭賦

夏侯嘉正

楚之南有水曰洞庭環帶五郡淼不知其幾百里臣乙酉夏使岳陽抵湖上思作賦明目披襟而觀之則翼然動足然跂慄然駭愕然眙恍若駕春雲而軾霓浩若浮汗漫而朝躋退若據太山之安進若履千仞之危惜若無識智若通微跛若不倚蹌若將馳耳不及掩目不暇逃情悖心嬉二三日而後神始宅氣始正若此不敢以賦爲事者二年然眷眷不已一日登崇邱望大澤有雲崕兮興歔兮止興止未霽忽若有遇由是漬陽輝沐芳澤覩一異人於巖之際霞爲裾雲爲袂冰膚雪肌金玦玉佩浮邱羨門斯實其對因言曰若非好辭者也臣曰然然則若智有所不通識有所不窮用不通不窮而循乎無端之紀若得無殆乎臣又曰然然至極則物應思精則道來嘉若之勤無譁無談吾爲若稱云太極之生曰地曰天中含五精五精之用而水居一焉水之疏邇則爲江兮遠則

爲河積則爲瀦兮總則爲湖若今所謂洞庭者傑立而孤廓然如
無區其大無徒含陽字陰元神之都曖曖昧昧百川不敢逾有若
臣者有若賓者有若僕者有若子者有若附庸者有若娣姒者有
若禹會塗山武巡牧野千出百會咸處麾下每六合澄靜中流迴
睨莽莽蒼蒼纖靄不翳太陽望舒出沒其閒萬頃咸沸彊而名之
爲巨澤爲長川爲水府爲太淵縱之不踰跼之不卑乍若賢人以
重自持誘之前犯之愈堅又若良將以謀乎邊澎澎濞濞浩浩爾
一致又若太始未有仁義沖沖漠漠二氣交錯又若混沌凝然未
鑿此乃方輿之心胸溟海之郭郭也三代之前其氣濩落浩浩滔
天與物迴薄滅木襄陵無霽無廓上帝降鑒巨人斯作乃命玄夷
授禹之機隧山堙谷滌源暢微然後若金在鎔若木在工流精成
器夫何不通是澤之設允執厥中旣異其性遂得其正有升有降
有動有靜臣應之曰升降動靜可得聞乎神曰水之性非圓非方
非柔非剛非直非曲非玄非黃劃象爲坎本乎義皇外婉而固內

健而彰降以姤始升以復張其靜處陰其動隨陽六府之甲萬化
之綱式觀是澤乃知天常若乃四序之變九夏攸處烘然而炎沸
然而賁羣物頽洞爍爲隆暑澤之作頎然其容若去若住若茹若
吐靈趨怪覲杳不可覩蒸之爲雲散之爲雨倏忽萬象如還太古
真可嘉也若乃秋之爲神素氣清泚肅肅脩脩羣籟四起澤之動
黝然其姿若挺若倚若行若止巽宮離離爲之騰風蒼梧崇崇爲
之供雲四顧一色黯然氤氲其聲潏潏若商非商若徵非徵東湊
海門一浪五千里又足畏也言其狀則石然而骨岸然而革氣然
而榮降切然而脉有山而心有洞而腹有玉而體有珠而目穹
鼻孤島呀口萬谷臂帶三吳足跬荆巫或跂然而望或翼然如趨
彭蠡震澤詎可云乎臣又問曰澤之態已聞命矣水之族將如何
居神曰大道變易或文或質沈潛自遂其類非一或被甲而遁或
曳裙而迓或禿而跋或角而蜿或吞而呀或呿而牙或心以之蟹
或脩以之鰕或修臂而立或橫驚而疾或髮於首或髯於肘或儼

而莊或毅而黝彪彪玢玢若太虛之含萬彙各備其生而合乎羣者也臣又問曰若神之資其品何如也神曰清矣靜矣麗矣至矣邈難知矣肇於古古有所未達形於今今有所未察非希非夷合其心於自然然後上天入地把三根六況水居陸處夫何不燭彼鯁鯁之賢轡龍之仙乃吾之肩也其餘海若天吳陽侯神胥齟齬而遊曾不我儔臣又問曰易稱王公設險是澤之險可以爲固而厯代興衰其義安取神曰天道以順不以逆地道以謙不以盈故治理之世建仁爲旌聚心爲城而弧不暇弦矛不暇鋒四海以之而大同何必持險阻何必據要衝若秦得百二而帝齊得十二而王其山爲金其水爲湯守之不義歟然而亡禍不在大恃之者敗水不在微怙之者危若漢疲於昆明桀困於酒池亦其類也故黃帝張樂而興三苗棄義而傾則知洞庭之波以仁不以亂以道不以賊惟賢者觀之而後得也於是盤旋徙倚凝精流視罄以辭對倏然而晦